

0004094

069704

A8.9.196

王氏潛齋醫書五種

云南中医學院
藏書之章
圖書館



海甯王孟英著

潛齋醫書五種

醫案

續醫案

溫熱經緯

飲食譜

霍亂論

民國元年夏上
海文瑞樓石印

王民醫書案



民國元年夏上
海文瑞樓石印

序

才不足以包乎所業之外則其業不精心不足以周乎所業之中則其業亦不精羿之射僚之丸張
旭之草書蘭子之舞劍其人皆負不可一世之才而俯首降心於一藝之微研窮玩索不能自己迨
其業之既成而天下莫能尚況乎醫之為道參天人之奧操性命之權其理至深其責至重而世顧
以無才無識之人挾不專不精之術貿貿施治絕人長年宜乎古人有學醫人費之慨也余自束髮
受書篤嗜軒岐之學以家貧無力致書所蓄者靈素而外立齋景岳諸種而已觀其援引之繁富議
論之辨博竊以為道在於是而按法施治輒為所困嗣得西昌喻氏之書伏而誦之始有以識夫病
情之蕃變方劑之準繩與夫寒暑陰陽之變化其才大而學博識高而法密有非薛張諸公所能髣
髴者然而尚論一編猶襲三綱之謬春溫一論混入傷寒之中白璧微瑕不能不為此老惜也歲在
乙巳服官江右廣搜百氏之書如葉天士之高超尤在涇之切實王晉三之精奧張路玉之明達以
及吳又可徐洄溪柯韻柏陳修園諸君子罔弗各具精心獨抒偉論靈蘭之祕闡發靡遺然而宗古
訓者矩矱勿失而不免於附會穿鑿崇妙悟者化裁生心而或涉於支離背謬夫醫主於愈病而已
偏執一途而故持高論縱名理湛深與病情無與也偶於坊間得武林王君孟英所著霍亂論一帙
其理明其詞達指陳病機判然若黑白之不可混淆以為飼鶴山人之流亞私心竊向往之己酉冬
余室人患痰飲脇痛屢藥弗痊漸即沈困適孟英來撫之金谿視吳侯醞香之疾亟走伴相邀惴惴
然恐不得一當乃孟英惠然肯來投藥五劑而大效並出初刊醫案回春錄見示因縱談古今之同
異百家之得失滔滔滾滾折衷悉當始知霍亂一論不過孟英一端之緒餘而又竊幸余向之私心

傾慕者為不誣也詢其近案積有數卷乃張柳吟趙菊齋諸君子所輯定而題其篇曰仁術志余取而讀之喜其崇論閎議足為世法因易其名曰王氏醫案與回春錄合為一編而附霍亂論於後并謬加評點付諸攻木之工以廣其傳蓋醫者生人之術也醫而無術則不足以生人醫而誤用其術則不惟不足以生人而其弊反至於殺人夫醫雖至庸未有忍於殺人者也而才不足以應紛紜之變學不足以窮古今之宜識不足以定真偽之幻則其術不精斯曰殺人而不自知故為醫而無才無學無識不可也為醫而恃才恃學恃識亦不可也必也平心以察之虛心以應之庶乎其可也夫古人因病而生法因法而成方理勢自然本非神妙惟用之而當斯神妙矣今才如孟英學如孟英識力精超如孟英而每臨一證息心靜氣曲證旁參務有以究乎病情之真而後已宜乎出奇制勝變化無方著之醫案卓卓可傳如是也余讀孟英之書於數年以前以為迢迢二千里山遙水阻必無相見之期乃吳君病而孟英來孟英來而余室適病宛轉牽引卒使數年來望風相思之友把袂盤桓傾吐肝鬲極苔岑遇合之奇夙世因緣諒非淺鮮孟英勉乎哉異日者擷眾籍之精華訂羣言之謬偽刪繁提要勒為一書以保全天下萬世之民命厥功甚鉅而為力亦甚艱天末故人所企望於良友者詎止斯醫案一編而已耶

道光三十年歲次庚戌知宜黃縣事楊照藜書於吟香書屋

序

予友王君孟英少年失怙其尊人彌留之際執孟英手而囑曰人生天地之間必期有用於世汝識斯言吾無憾矣孟英泣拜而銘諸心版然自顧家貧性介不能為利達之人將何以為世用耶聞先哲有不為良相則為良醫之語因自顏其室曰潛齋而銳志於軒岐之學潛心研究遂抉其微年未冠遊長山即納交於予每見其治病之奇若有天授而視疾之暇恒手一編不輟也繼瞻其齋頭一聯云讀書明理好學虛心可見苦志力學蘊之胸中者淵深莫測乃能窮理盡性出之指下者神妙難言二十年來活人無算豈非以用世之才運其濟世之術而可垂諸後世者哉今就予耳目所及之妙法仿丁長孺刻仲淳案之例錄而付梓名曰回春錄見聞有限遺美極多世之君子必有如莊歛之華岫雲其人者更為之遠搜博采以廣其傳而予糠粃在前有榮施矣

道光二十三年癸卯冬十二月愚弟周 鏞拜題

例言

一所錄皆二十年來見聞所及詳載字姓歷歷可徵間有逸其名氏者偶忘之耳

一淺易之證尋常治法所能療者槩不泛錄

一難辨之證誤藥即成危候而初病乃能洞燭遽爾霍然雖若無奇不可不錄後學苟能留意庶免以藥釀病之辜

一病有虛實寒熱治分補瀉溫涼更有補瀉互投之法寒熱並用之宜者以標本真情證因錯雜也

此錄諸案具備法無偏倚不愧一代之良工矣

一六氣皆從火化凡外感之邪雖傷寒必以顧陰為主況溫熱暑燥之病更多於傷寒而熱之灼陰尤為勢所必然耶觀案中治感多以涼潤清解為法是參天人一致之理以談醫非泥古耳食之徒所能窺測也

一孟英可傳之案何僅止此惜予未能窮蒐廣討也凡荷其再造之人不妨陸續補刊以推廣仁術而嘉惠來茲匪惟忠厚當然即是心存濟世故不以上下分帙而以卷一卷二為次蓋欲卷數之遞增無已耳

一案中辨證固多發人之未發他如論阿片之燥烈傷津豬肉之柔潤充液之類尤為有功於世是不僅某藥治愈某病之案讀者須加咀嚼勿囫圇下也

一孟英雖用藥極平淡而治病多奇中故其辨證處方同道莫不折服茲所錄案已見一斑附采玉芝丸數方藥易功優更徵立法之善至爛喉痧方雖從金匱翼錄出而孟英命其名曰錫類散且聞授其方於莊芝階金原谷兩中翰修合濟人救全不少凡屬外淫喉患無不應手而瘳不特爛喉痧藉以為神丹也敢不附載以廣其傳乎

王氏醫案卷一 原名回春錄

杭州王士雄孟英著



同郡周 鏞光遠輯錄

乾薑辛溫故用之以回陽氣若併此不得則令壯盛人以氣呵之亦可救倉卒之弊

云南中醫學院

予每以此法治陽證瘡毒莫不應手取效真妙方也

甲申夏予於登廁時忽然體冷汗出氣怯神疲孟英視之曰陽氣欲脫也卒不及得藥適有三年女佩薑一塊約重四五錢急煎而灌之即安後用培補藥率以參耆朮草為主蓋氣分偏虛也
范慶簪年踰五十素患痰嗽乙酉秋在婺驟然吐血勢頗可危孟英診曰氣虛而血無統攝也雖向來咳嗽陰虧陰藥切不可服然非格陽吐血附桂更為禁劑乃以潞參耆朮苓草山藥扁豆橘皮木瓜酒炒芍藥為方五帖而安繼去甘草木瓜加熟地黃黑驢皮膠紫石英麥冬五味子龍骨牡蠣熬膏服之全愈亦不復發後范旋里數年以他疾終

丙戌春倉夫鄭德順患急證時已二鼓丐孟英視之見其扒牀拉席口不能言惟以兩手指心抓舌而已孟英曰中毒也取綠豆二升急火煎清湯澄冷灌之果即霍然詰朝詢其故始言久患臂痛因餌草頭藥下噤後即心悶不可耐舌麻不能言而旁人不知也錄此足以徵孟英臨證之燭照如神亦可見草藥之不可輕試也

癸人羅元奎丁亥夏卒發寒熱旋即嘔吐不能立自言脘間痛不可當孟英視其痛處焮赤腫硬形如肥皂筴橫梗於毛際之左乃曰此證頗惡然乘初起可一擊去之也用金銀花六兩生甘草一兩皂角刺五錢水煎和酒服之一劑減其勢再劑病若失逾年患傷寒孟英切脈虛細已極曰此不可徒攻其病者以陰分太虧耳與景岳法以熟地當歸酒炒白芍炙甘草橘皮柴胡等藥一劑而瘳予素患噫氣凡體稍不適其病即至既響且多勢不可遏戊子冬發之最甚苦不可言孟英曰此陽

元參能滋水以制火獨用則力厚取效倍捷

氣式微而濁陰上逆也先服理中湯一劑隨以旋覆代赭湯投之遂愈嗣後每發如法服之輒效後來發亦極輕今已不其發矣予聞孟英常云此仲聖妙方藥極平淡奈世人畏不敢用殊可陋也

有患陰虛火炎者面赤常如飲酒之態孟英主一味元參湯其效若神而屢試皆驗
黟人葉殿和庚寅秋患感旬日後汗出昏督醫皆束手乃甥余微垣浼孟英勘之曰此真陰素虧過服升散與仲聖誤發少陰汗同例下竭則上厥豈得引亡陽為比而以附桂速其斃耶以元參地黃知母寸草白芍黃連茯苓小麥龜板鼈甲牡蠣驢皮膠為大劑投之得愈

海陽趙子升辛卯夏病瘧急延孟英視之曰暑熱為患耳不可膠守於小柴胡也與白虎湯一啜而瘥甲午秋范麗門患温瘧孟英用白虎加桂枝以痊之丙申夏盛少雲病濕熱瘧孟英以白虎加蒼朮湯而安己亥夏予舅母患瘧服柴胡藥二三帖後汗出昏厥妄語遺溺或謂其體質素虛慮有脫變勸服獨參湯幸表弟壽者不敢遽進乃邀孟英商焉切其脈洪大滑數曰陽明暑瘧也與傷寒三陽合病同符與竹葉石膏湯兩劑而瘳庚子夏滇人黃肖農自福清赴都道出武林患暑瘧孟英投

白虎湯加西洋參數帖始愈辛丑秋顧味吾室人病瘧瘧孟英亦主是方而效莊芝階中翰張安人年踰花甲虛熱甚熾孟英審視再四亦與竹葉石膏湯而安聞者無不驚異予謂如此數證體分南北質有壯衰苟非識證之明焉能藥與病相當而用皆適宜哉

壬辰八月范蔚然患感旬餘諸醫束手乃弟麗門懇孟英治之見其氣促音微呃忒自汗飲水下嚔隨即傾吐無餘曰伏暑在肺必由温散以致劇也蓋肺氣受病治節不行一身之氣皆失其順降之機即水精四布亦賴清肅之權以主之氣即逆而上奔水亦泛而上溢矣但清其肺則諸恙自安乃

妙論不獨治暑為然凡上而不下之證皆可類推

閱前服諸方。始則柴葛羌防以升提之火。藉風威吐逆不已。猶謂其胃中有寒也。改用桂枝乾薑以溫燥之。火上添油。肺津欲絕。自然氣促音微。疑其虛陽將脫也。徑與參歸蛤蚧柿蒂丁香以補而納之。愈補愈逆。邪愈不出。欲其愈也難矣。亟屏前藥。以瀉白散合清燥救肺湯數服而平。

一何叟年近八旬。冬月傷風。有面赤氣逆煩躁不安之象。孟英曰。此喻氏所謂傷風。亦有戴陽證也。不可藐視。以東洋人參細辛炙甘草熟附片白朮白芍茯苓乾薑五味胡桃肉細茶葱白一劑而瘳。

孟英曰。此真陽素擾。痰飲內動。衛陽不固。風邪外入。有根蒂欲拔之虞。誤投表散。一汗亡陽。故以真武四逆諸法回陽鎮陰。攘外安內。以為劑也。不可輕試於人。致干燥刀之辜。慎之慎之。

癸巳秋。予在婺患瘧。大為醫人所誤。初則表散。繼則滋補。延及月餘。肌肉盡削。寒熱不休。且善嘔惡食。溺赤畏冷。乃買棹旋杭。託孟英診視。曰。足太陰濕瘧也。以金不換正氣散三啜而安。然元氣為誤藥所傷。多方調補。甫得康健。次年秋復患瘧於婺友。人咸舉醫療。予概却之。憶病情與前無異。即於篋中檢得孟英原方。按序三帖。病亦霍然。聞者無不稱歎。後歸里。為孟英述而謝之。孟英曰。瘧情如是。恐其按年而作。乃授崇土勝濕丸。方明年夏。今預服以堵禦之。迄秋果無恙。後竟不發矣。

鍾耀輝年踰花甲。在都患腫。起自腎囊。氣逆便溏。諸治不效。急買車返杭。託所親謝金堂邀孟英治之。切其脈微而弱。詢其溺清且長。曰。都中所服。其五苓八正耶。抑腎氣五皮也。鍾云。誠如君言。偏嘗之矣。而病反日劇者。何哉。孟英曰。此土虛不制水也。通利無功。滋陰亦謬。法宜補土勝濕。與大劑參朮果即向安。越八載。以他疾終。

金元章媳。於甲午新寡。後患膿窠疥。大抵濕熱之病。耳瘍醫連某疑為遺毒。竟作廣瘡瘡。漸至上吐

木果即向安。越八載。以他疾終。

金元章媳。於甲午新寡。後患膿窠疥。大抵濕熱之病。耳瘍醫連某疑為遺毒。竟作廣瘡瘡。漸至上吐

下利不進飲食。另從內科治亦無寸效。延至未春。更兼腹痛自汗。汎愆肌削。諸醫皆見而却走矣。王仲安薦孟英視之。曰。此胃氣為苦寒所敗。肝陽為辛熱所煽。前此每服陽剛。即如昏冒。稍投滋膩。泄瀉必增。遂謂不治之證。未免輕棄。乃以四君子加左金。椒梅蓮子。木瓜餘糧石脂等。出入為方。百日而愈。第信猶未轉也。諸親友環議。再不通經。病必有變。孟英力辨。此非經阻。可通之證。惟有培養生化之源。使其氣旺血生。則流行自裕。若不揣其本而齊其末。則礮糠不能榨油。徒傷正氣。盡隳前功。豈不可惜。眾議始息。恪守其方。服至仲冬。天癸至而肌肉充。康復如常矣。

朱某患嘔吐。諸藥不效。甚至大小便秘。糞從口出。臭不可當。自問不起矣。孟英用代赭旋覆湯加蜆上者下之之法而意螂蟲服之而愈。

孟英邃於醫學。從不侈談脈理。足以見其欲然不自足也。而脈理之最不易切者。莫如妊娠。予聞孟英於乙未春診黃履吉室人之脈。曰。妊也。是月天癸猶來。人皆不以為然。次月仍轉。但不多耳。復邀孟英診之。曰。果妊也。況不斷者。陰胎之血有餘耳。踰月汎復。行覺更少矣。人猶以為妄也。四月後經始停。娠亦顯。婉如期。人始服其見老。丙申夏。滿洲某選粵東鹽場。攜眷之任。過浙。主於李雲臺家。請孟英視其如君之恙。孟英診曰。非病也。熊羆入夢矣。某頗不信。謂經甫停。何以遽斷為孕。而又必其為男乎。反生言過其實之疑。既而某延雲臺入幕。偕赴粵。任次年雲臺於家書中。述及居停果得子。深歎孟英指妙。予荆人久無孕。辛丑秋。汎事偶愆。孟英一診。即以妊斷。且以男許。次夏果舉一子。惜不育耳。邵魚竹給諫。仲媳懷妊。孟英於寅春初診。即許抱孫。秋杪果應。表弟胡壽者室。偶有小忿。經事澇少。腰腹微脹。自以為怒氣所滯也。延孟英調之。切其脈。曰。懷麟矣。初猶疑之。既而始信。卯春果

娠孕之脈最為難憑。有初者有三四月。始終不現於脈者。此與憑脈斷證有時。可憑有時。不足憑。同一至理。予嘗以此質之孟英。孟英亦以為然。

可見真學問
人必不恃虛
言以眩世也

弄璋吳雲階室年四十餘寅秋況斷其腹日脹醫謂病也治之罔效迺孟英診之孕也彼猶不自信及腹中漸動始服其言至期產一女癸秋孟英治石誦義室腕痛甫愈適汎踰期即曰娠矣既而果日形著其指下之神妙如此

朱恒山久患胸痞多痰諸藥罔瘳孟英診曰清陽之氣不司旋運也與參耆苓朮之劑豁然頓愈因極欽服後數年果以汗脫聞其垂危之際口不能言猶以左手橫三指右手伸一指加於上作王字狀以示家人有會其意者急追孟英至而他醫之中風藥早灌入矣遂以長逝癸卯冬至前一日管大中丞亦是氣從溺脫當以參附挽回者及孟英至而痰藥痧藥風藥灌之徧矣服僅若蛛絲過指孟英堅不與方須臾而卒

無棣張柳吟封翁於乙未夏偕令嗣恒齋刺史赴滇南任道出武林其家人鄭九者封翁寵人之弟也途次抱恙抵杭日招越醫陳六順診治服藥後汗出昏狂精流欲脫封翁大駭躬詣孟英以希挽救孟英切其脈既數且亂沈取極細乃語封翁曰此證頗危生機僅存一綫亦斯人之陰分素虧不可竟謂附桂之罪也封翁聞言大悅曰長者也不斥前手之非以見證之險而要譽相見恨晚遂訂忘年之交彼此盡吐生平始知封翁最喜談醫岐黃之書無所不覽惟不肯為人勘病亦慎重之意耳於是孟英以元參知柏桑枝龍牡生地白芍甘草百合石斛梔子鹽水炒淡豆豉為大劑灌之下嚙即安次日去梔豉甘草加龜板鼈甲鹽水炒橘紅十餘帖而康

吳馥齋令妹稟質素弱幼時鳳山診之許其不秀癸巳失其怙恃情懷悒悒汎事漸愆寢食皆廢肌瘦吞酸勢極可畏孟英以高麗參鹽水炒黃連甘草小麥紅棗百合茯苓牡蠣白芍旋覆花新絳等

治之各恙漸已繼參歸地滋陰康強竟勝於昔

一男子患喉痺專科治之甫愈而通身腫勢日甚醫者驚走孟英診之曰病藥也投附子理中湯數

劑而痊予謂喉痺治以寒涼法原不謬而藥過於病翻成溫補之證是病於藥也非病於病也嘗聞

孟英云病於病而死者十之三病於藥而死者十之七以予觀之誠非激論也吁可歎已

朱氏婦產後惡露不行而宿哮頓發專是科者不能下手孟英以丹參桃仁貝母茯苓滑石花粉桂

枝通草蛤殼苡仁紫苑山查絲瓜子羌蔚子旋覆琥珀出入為方三日而愈

局醫黃秀元之輿人韓名諒者有兒婦重身患熱病局中諸醫皆慮胎隕率以補血為方旬日後勢

已垂危浼人求孟英診之曰胎早腐矣宜急下之或可冀幸若欲保胎則吾不知也其家力懇疏方

遂以調胃承氣合犀角地黃湯加西洋參麥冬知母石斛牛膝投之胎落果已臭爛而神氣即清熱

亦漸暖次與西洋參元參生地知母麥冬丹參丹皮茯苓山查石斛豆豉羌蔚琥珀等藥調之粥食

日加旬餘而愈

一少年驟患遺精數日後形肉大脫連服滋陰瀆精之藥如水投石孟英與桂枝湯加參耆龍牡服

下即效匝月而瘳

家叔南山於秋間患感日治日劇漸至神昏譫妄肢振動惕施秦兩醫皆謂元虛欲脫議投峻補家

慈聞而疑之曰盍與孟英商之孟英診曰無恐也通絡蠲痰可以即愈用石菖蒲羚羊角絲瓜絡冬

瓜子淡仁桑枝旋覆橘絡葱鬚貝母鈎藤膽星為劑化服萬氏牛黃清心丸一顆覆杯即安調理半

月而愈

美政關毛內使年踰花甲而患喘嗽醫與腎氣湯全鹿丸等藥反致小溲瀉痛病日以劇孟英診之與純陰壯水之治毛曰我輩向吸阿片烟豈敢服此涼藥孟英曰此齊東之野語也誤盡天下蒼生幸汝一問吾當為世人道破機關不致誤墮火坑者再為積新貯油之舉也夫阿片本罌粟花之脂液性味溫澀而又產於南夷之熱地煎曬以成土熬煎而為膏吸其烟時還須火煉燥熱毒烈不亞於砒久吸之令人枯槁豈非燥烈傷陰之明驗哉毛極拜服果得霍然或問曰阿片之性殆與酒相近乎孟英曰麴蘖之性雖熱然人飲之則質仍化水故陰虛者飲之則傷陰陽虛者飲之則傷陽景岳論之詳矣若阿片雖具水土之質而性從火變且人吃之則質化為烟純乎火之氣誠直行清道燦人津液故吸烟之後口必作渴久吸則津枯液竭精血源窮而宗筋失潤人因見其陽痿也不察其所以痿之故遂指阿片為性冷之物抑又何耶凡吸阿片烟而醉者以陳醬少許淪湯服即醒若熬烟時少著以鹽即渙散不凝膏吸時舌上預舐以鹽則不成癮雖癮深者但令舐鹽而吸則癮自斷豈非潤下之精能制炎上之毒乎

金元章年踰七旬久患疝厥每病於冬以為寒也服熱藥而暫愈終不能霍然孟英診曰脾腎雖寒肝陽內盛徒服剛烈焉能中肯以參朮枸杞菴蓉茴香當歸菟絲鹿角霜桂茯苓棟實黃連吳萸橘核等藥為方服之今數年無恙矣

丙申春蜀人石符生將赴鄧雲厓司馬之招經杭抱病僑於張柳吟之舊館亦為寓側陳六順治困居停主人知之即告以柳吟僕病之事石聞之悚然亟遣人延孟英診焉脈沈而澀滯模糊不分至數肢涼畏冷涎沫上涌二便瀉少神氣不爽曰此途次感風濕之邪失於解散已從熱化加以溫補

致氣機愈形窒塞邪熱漫無出路必致燥液成痰逆行而上但與舒展氣機則痰行熱降諸恙自瘳矣以黃連黃芩枳實橘皮梔子淡豉桔梗杏仁貝母鬱金通草紫苑竹茹蘆朮汁等藥三服而起調理匝旬遂愈

夏間王某患感越醫謝樹金治之病雖退而能食矣但不能起坐類乎癱瘓延已月餘人皆謂其成廢所親鍾某浼孟英視之曰此多服表散汗出過分氣血兩傷肢骸失其營養脈微而細舌亮無苔與大劑參耆歸朮熟地杜仲兔絲牛膝枸杞山藥木瓜萸肉姜蕤續斷桑枝數十帖而起一勞力人陰分素虧驟感風濕兩膝刺痛痠不能稍立孟英以六味地黃湯加獨活豆卷一劑知二劑已

張養之令正飲食如常而肌膚消瘦信事如期而紫淡不恒兩腓發熱而別處仍和面色青黃而隱隱有黑氣儼似虛塞多藥不效始逆孟英診之脈似虛細而沈分略形絃滑曰此陽明有餘少陰不足土燥水涸仲聖有急下存陰之法然彼外感也有餘之邪可以直瀉此內傷也無形之熱宜以甘寒義雖同而藥則異也贈以西洋參生地生白芍生石膏知柏苓梔麥冬花粉棟實丹皮木通天冬諸品服至數片黑氣退而肥漸充腓熱去而經亦調矣

姚氏婦產後昏譫汗厥肌膚浮腫醫投補虛破血祛祟安神之藥皆不能治舉家惶怖轉延孟英診焉詢知惡露仍行曰此證醫家必以為奇病其實易愈也昔金尚陶先生曾治一人與此相似載於沈堯夫女科輯要中方用石菖蒲膽星旋覆茯苓橘紅半夏麴名蠲飲六神湯凡產後惡露行而昏譫者多屬痰飲不可誤投攻補此湯最著神效如方服之良愈

孟英善用甘寒投之此證尤宜

牙行王炳華妻患舌瘡痛礙飲食內治外敷皆不效孟英視其舌色紅潤脈形空數曰此血虛火浮也。以產後發熱例施之。用熟地當歸酒炒白芍炙甘草茯苓炮薑投之。其病如失。

一老人霍亂後目閉呃忒醫謂脫陷在即與桂附回陽之藥業已煎矣適孟英至詢知溺赤口乾診得脈形與數而藥香撲鼻即曰此藥中有肉桂叟勿服也服之必死。迫令將藥傾潑而與肅肺清胃之劑果得漸安。

丁酉中秋夜牙行張鑑錄年踰花甲卒仆於地急延孟英脈之弦滑而大曰痰氣食相併而逆於上也。先以烏梅擦開牙關橫一竹箸於口灌以淡鹽薑湯隨入鵝翎探之探出痰食太息一聲而甦次與調氣和中而愈後數年以他疾終此案雖無奇而辨證之明不可不錄。

姚樹庭以古稀之年而患久瀉羣醫雜治不效僉以為不起矣延至季秋邀孟英決行期之早晚非敢望愈也。孟英曰絃象獨見於右關按之極弱乃土虛木賊也。調治得法猶可引年何以遽爾束手乎。乃出從前諸方閱之皆主溫補升陽曰理原不背義則未盡耳。如薑附肉蔻骨脂之類氣熱味辣雖能溫臟反助肝陽肝愈強則脾愈受戕且辛走氣而性能通泄與脫者收之之義大相刺謬而鹿茸升麻可治氣陷之瀉而非斡旋樞機之品至熟地味厚滋陰更非土受木剋脾失健行之所宜縱

加砂仁酒炒終不能革其膩滑之性方方用之無怪乎愈服愈瀉徒藉景岳窮必及腎為口實也。與異功散加山藥扁豆蓮子烏梅木瓜芍藥蒺藜石脂餘糧服之果效恪守百日竟得康強越三載以他疾終。

戊戌春張雨農司馬必欲孟英再越環山孟英因其受病之深且公事掣肘心境不能泰然誠非藥

語語精義由
此類推可以
知用藥之權
衡矣

石之可以為力也。固辭不往。司馬泣然哀懇。但冀偕行旋署。則任君去留可耳。并囑趙蘭舟再四代陳曲悃。孟英感其情。同舟渡江。次剡溪。司馬譚及體氣羸憊情形。孟英忽曰。公其久不作嚏乎。司馬曰。誠然有年矣。此曷故也。孟英曰。是陽氣之不宣布耳。古惟仲景論及之。然未立治法。今擬鄙方奉贈。博公一嚏如何。司馬稱善。遂以高麗人參乾薑五味石菖蒲酒炒。薤白半夏橘皮紫苑桔梗甘草為劑。舟行抵嵎。登陸取藥煎而服之。駕輿以行。未及二十里。司馬命從人詣孟英車前報曰。已得嚏矣。其用藥之妙如此。

夏間牙行倪懷周室。新產數日。泄瀉自汗。嘔吐不納。專科謂犯三禁。不敢肩任。孟英診脈虛微欲絕。證極可虞。宜急補之。遲不及矣。用東洋參耆木龍牡酒炒。白芍桑枝木瓜扁豆茯苓橘皮紫石英黑大豆投之。四劑漸以向安。予謂新產後用參耆大補。而又當盛夏之時。非有真知灼見者不能也。誠以天下之病。千變萬化。原無一定之治。奈耳食之徒。惟知執死方以治活病。豈非造孽無窮。亦何苦人人皆欲為醫。而自取罪戾耶。

張養之令姪女患。汎愆而飲食漸減。予某與通經藥服之。尤惡穀。請孟英診之。脈緩滑。曰。此痰氣凝滯。經隧不宣。病由安坐不勞法。以豁痰流氣。勿投血藥。經自流通。于某聞而笑曰。其人從不吐痰。血有病而妄治其氣。脹病可立待也。及服孟英藥。果漸吐痰。而病遂愈。養之大為折服。予謂世人頭痛治頭。脚痛療脚。偶中而愈。貪為己功。誤藥而亡。竟將奚白。此寓意草之所以首列議病之訓也。孟英深得力於喻氏。故其議病。迥出凡流。要知識見之。超總由讀書而得。雖然。人存政舉。未易言也。毛允之戌冬。患感初治。以溫散繼。即以滋陰。病日以劇。延至亥春。或疑為百日之勞。或謂是傷寒壞。

清熱生津治法固善然亦此人本元堅固故屢誤之後猶能挽回否則亦難為力矣

祛痰清熱滋陰鎮驚力量甚大此必本虛標實者故其方如此

證而鳳山僧主升柴耆木以補之丁卯橋用輕粉巴霜以下之雜藥徧投形神日瘁乃尊學周延孟英視之脈來澀數上溢呃忒口膩雖覺嗜飲而水難下膈頻吐涎沫便秘溺赤潮熱往來少腹如烙按之亦不堅滿曰此病原屬冬溫治以表散則津液傷而熱乃熾繼以滋填熱邪愈錮再施溫補氣機更窒升柴耆木欲升其清而反助其逆巴霜輕粉欲降其濁而盡刮其陰病及三月發熱不是表邪便秘旬餘結滯非關積滯且派澀為津液之已傷數是熱邪之留著溢乃氣機為熱邪所壅而不得下行豈非溫邪未去得補而膠固難除徒使其內燥真陰上薰清道以致一身之氣盡失肅清之令法當搜剔餘邪使熱去津存即是培元之道伸其治節俾濁氣下趨乃為宣達之機何必執參茸為補虛指硝黃為通降哉以北沙參紫苑麥冬知母花粉蘭草石斛丹皮黃芩桑葉梔子黃連木通銀花橘皮竹茹蘆根橄欖枇杷葉地栗海蛇等出入為方服之各恙遞減糜粥漸加半月後始得大解而腹熱全消穀食亦安乃與滋陰善後而愈

張養之所親李某戊冬醉飲夜歸為查段巡員所嚇神志即以漸昏治之罔效至於不避親疎裸衣笑罵力大無制糞穢不知己夏延孟英視之用石菖蒲遠志龍齒龜板犀角羚羊元參丹參知柏梔子龍膽草枳實黃連竹黃竹瀝石膏赭石黑鉛鐵落出入為方十餘帖吐瀉膠痰甚多繼與磁珠丸漸以向愈

一祝叟年近古稀己亥春赴席忽仆地痰涌肢強眼斜舌蹇不語外科王瑞芝薦孟英視之投六君子加蠟梢^{肝脈痰面圓到}羚羊角膽星石菖蒲竹瀝薑汁而瘳

茅家埠翁嘉潤患腰痠愈而復發者五年費用不貲諸瘍醫治之不效盛少雲囑其求治於孟英切

其脈絃細以數曰子之幸也此內損證外科惡乎知與大劑甘潤滋填之藥匝月而痊至今不發
胡琴泉舅氏家一潘媪年踰古稀患霍亂轉筋瀕危孟英用自制蠶矢湯而瘳

一少婦分娩胞水早破胎澀不能下俗謂之漚漿生催生藥遍試不應孟英令買鮮豬肉一二斤洗
淨切大塊急火煎湯吹去浮油恣飲之即產母子皆生且云豬為水畜其肉最腴大補腎陰而生津
液予嘗用治腎水枯涸之消渴陰虛陽越之喘嗽並著奇效仲聖治少陰咽痛用豬膚亦取其補陰
虛而戢浮陽也後賢不察反指為有毒之物汪訥庵非之是矣惟外感初愈及虛寒滑瀉濕盛生痰
之證概不可食以其滋膩更甚於阿膠熟地龍眼也然豬以浙產者為良北豬不堪用吾杭燥肉鮓
即豬皮為之可以致遠入藥尤為簡當不必泥於皮與膚之字面而穿鑿以誇考據也

秋初家慈猝仆於地急延孟英診之脈浮絃以滑用羚羊角膽星牡蠣石菖蒲丹參茯苓鈎藤桑葉
貝母橘紅蒺藜等以順氣蠲痰息風降火而痊癸卯春前數日忽作欠伸而厥孟英切脈微弱而絃
曰病雖與前相似而證則異矣以高麗參白朮何首烏山茱萸枸杞桑甚石斛牛膝蒺藜橘紅牡蠣
等鎮補攝納以瘳予謂此等證安危在呼吸之間觀前後卒仆數案可見其辨證之神雖古人不多
讓況世俗之所謂醫乎家慈兩次類中予皆遠出微孟英吾將焉活感銘五內聊識數言惟願讀是
書者體其濟世之心臨證得能如是將胥天下之沈疴而盡起矣

張養之弱冠失怙後即遭无妄之疾纏綿七載罄其貲財經百十三醫之手而病莫能愈因廣購岐
黃家言靜心參考居然自療而痊然鼻已壞矣抱此不白之冤自慙形穢乃閉戶學書專工作楷其
志良可悼也孟英因與之交見其體怯面青易招外感夏月亦著複衣頓吐白沫詢知陽痿多年常

服溫辛之藥孟英屢諫之而已亥九月間患惡寒頭痛自餌溫散不效逆孟英診之脈極沈重按至骨則絃滑隱然卧曲房密帳之中爐火重裘尚覺不足以禦寒且涎沫仍吐毫不作渴胸腹無脹悶之苦咳嗽無暫輟之時惟大解堅燥小溲不多口氣極重耳乃謂曰此積熱深錮氣機鬱而不達非大苦寒以瀉之不可也養之初猶疑焉及見方案辨論滔滔乃大呼曰弟之死生係乎一家之命惟君憐而救之孟英慰之曰我不惑外顯之假象而直斷為實熱之內蘊者非揣度之見而確有脈證可憑但請放心靜養不必稍存疑畏及二三帖後病不略減諸友戚皆詆藥偏於峻究宜慎重服之有于某者揚言於其族黨曰養之之命送於孟英之手矣衆楚交咻舉家惶惑次日另延陳啟東暨俞某並診孟英聞之急詣病榻前謂曰兄非我之知己也則任兄服誰之藥我不敢與聞也兄苟裕如也則任兄廣徵明哲我不敢阻撓也今兄貧士也與我至交也拮据資囊延來妙手果能洞識病情投劑必效則我亦當竭力從通也第恐雖識是病而用藥斷不能如我之力專而劑大也苟未能確識是證而以無毀無譽之方應酬塞責則因循養患誰任其咎也或竟不識是病而開口言虛動手即補甘言悅耳兄必信之我不能坐觀成敗如秦人視越人之肥瘠也今俞某之方如是陳醫殊可却之速著人趕去辭絕留此一款以作藥資不無小補況連服苦寒病無增減是藥已對證不比平淡之劑誤投數帖尚不見害也實由熱伏深錮藥未及病今日再重用硝黃犀角冀頑邪蘊毒得以通泄下行則周身之氣機自然流布矣養之伏枕恭聽大為感悟如法服之越二日大便下如膠漆穢惡之氣達於戶外而畏寒即以遞減糜粥日以加增旬日後糞色始正百日後康健勝常嗣後雖嚴冬亦不甚畏冷偶有小恙輒服清潤之方陽道復興近添一女養之嘗頌於人曰孟英之手眼

此是熱痰伏
於肺絡故用
藥如此

或可得而學也孟英之心地不可得而及也我之病奇病也孟英雖具明眼而無此種熱情勢必築室道旁亂嘗藥餌不能有今日矣況不但有今日而十餘年深藏久伏之病一旦掃除自覺精神勝昔可為後日之根基再生之德不亦大哉

孫午泉進士患哮喘多氣逆不能著枕服溫散滋納藥皆不效孟英與北沙參桂枝茯苓貝母花粉杏仁冬瓜仁絲瓜絡枇杷葉旋覆海石蛤殼等藥覆杯即卧數日而痊

石符生隨乃翁自蜀來浙同時患瘧醫者以小柴胡湯加薑桂投之不效即用四獸休瘧等法反致惡寒日甚穀食不進惟飲燒酒薑湯圍火榻前重裘厚覆胸腹痞悶喜以熱熨猶覺冷氣上衝頻吐粘稠痰沫延至臘初疲憊不堪始憶及丙申之恙訪孟英過診脈沈而滑數苔色黃膩不渴便溏溺赤曰是途次所受之暑濕失於清解復以溫補之品從而附益之釀成痰飲盤踞三焦氣機為之阻塞所以喜得熱熨熱飲氣衝反覺如冰若不推測其所以然之故而但知聞問在切脈之先一聽氣冷喜熱無不以為真贖現獲孰知病機善幻理必合參以脈形兼證並究則其為真熱假寒自昭昭若揭矣與大劑苦寒之藥而以蘆菴湯煎漸服漸不畏寒痰漸少穀漸增繼用甘涼善後喬梓皆得安痊

杭州王士雄孟英著

同郡周 鏞光遠輯錄

庚子春戴氏婦產後惡露不多用山查益母草酒煎連服數日遂發熱自汗口渴不飢眩暈欲脫徹夜不眠孟英視之曰此稟屬陰虧血已隨胎而去雖惡露甚少但無脹痛之苦者不可妄投藥餌酒煎益母山查不特傷陰且能散氣而汗泄口乾津液有立竭之勢即仲聖所謂無陽也蓋人身天真之氣謂之陽陽根於津陰化於液津液既奪則陽氣無根而眩暈陰血不生而無寐若補氣養陰則舍本求末氣血不能生津液也惟有澄源潔流使津液充而氣血自復庶可無憂以西洋參生黃耆龍骨牡蠣萎蕤百合甘草麥冬生薏苡生扁豆石斛木瓜桑葉蔗漿投之一劑即安數日而愈後以滋填陰分服之乃健

王某久患吐血體極孱弱沈琴癡囑其丐孟英治之服藥甫有小愈而酷暑之時陡患霍亂轉筋大汗如雨一息如絲孟英視曰陰血久奪暑熱鴟張吾霍亂論中之缺典也姑變法救之用北沙參枳杷葉龍牡木瓜扁豆苡仁滑石桑葉蠶砂石斛豆卷投之良愈調理每日仍服滋補以治宿恙越二載聞服溫補藥致血暴涌而已

赤山埠李氏女素稟怯弱春間汛事不行脇腹聚氣如瘕減餐肌削屢服溫通之藥至孟秋加以微寒壯熱醫仍作經閉治勢瀕於危乃母託伊表兄林豫堂措辦後事豫堂特請孟英一診以決之孟英切其脈時壯熱烙指汗出如雨其汗珠落於脈枕上微有粉紅色乃曰虛損是其本也今暑熱熾盛先當治其客邪庶可希冀疏白虎湯加西洋參元參竹葉荷桿桑葉及何醫至一籌莫展聞孟英

主白虎湯乃謂其母曰危險至此尚可服石膏乎且本草於石膏條下致戒云血虛胃弱者禁用豈彼未之知也豫堂毅然曰我主藥與其束手待斃盍從孟英死裏求生之路耶遂服二帖熱果退汗漸收改用甘涼清餘熱日以向安繼與調氣養營陰宿痼亦消培補至仲冬汎至而痊次年適孫夔伯之弟

張氏婦患氣機不舒似喘非喘似逆非逆似太息非太息似虛促非虛促似短非短似悶非悶面赤眩暈不飢不卧補虛清火行氣消痰服之不應孟英診之曰小恙耳旬日可安但須懲忿是囑與黃連黃芩梔子棟實鼈甲羚羊角旋覆赭石海蛇地栗為大劑送當歸龍薈丸未及十日汎至其色如墨其病已若夫後與養血和肝調理而康

牙行王炳華室夏患臂痛孫某曰風也服參耆歸芍數帖臂稍愈而腕痛孫曰寒也加以附桂痛不止而漸覺痰多孫曰肝腎不足也重用熟地枸杞令其多服取效不料愈服愈劇漸至昏厥孫尚以為藥力之未到病體之久虛前方復為加重甚而時時發厥始請孟英診之脈沈而有絃滑且數之象乃謂炳華曰此由過投溫補引動肝風煽其津液為痰痰復乘風而上此暈厥之由來也餘波則奔流經絡四肢因而抽搐陽氣盡逆於上宜乎鼻塞面浮濁氣不能下達是以便滯不飢炳華曰神見也溫補藥服幾三月矣不知尚可救乎孟英曰勿疑吾藥猶有望焉遂與大劑甘寒息風化飲佐以涼苦泄熱清肝厥果漸止各恙遞蠲兩月後康復如常予偶於舊書中檢得無名氏鈔本一冊所錄多岐黃之言內一條云附桂回陽在一二帖之間萬一誤投害亦立至功過不掩其性之毒烈也概可見矣奈世人不知藥為治病而設徒以貪生畏死之念橫於胸中遂不暇顧及體之有病無病

病之在表在裏但聞溫補之藥無不欣然樂從者模稜之輩趨競存心知其死於溫補而無怨悔也乃衣鉢相傳不必察其體病服證之千頭萬緒僅以溫補之品二十餘味相迭為用即成一媚世之方且託足金匱之門摹擬腎氣之變蓋知熟地之陰柔可縛附桂之剛猛誤投不致即敗偶中又可邀功包藏禍心文姦飾詐何異新莽比周公子雲學孔聖哉人以其貌古人而口聖賢也多深信而不疑迨積薪既厚突火頓然雖來爛額焦頭之客其不至於焚身者幸矣較彼猛浪之徒誤投純陽藥致人頃刻流血而死者其罪當加十等誅心之論救世之言知我罪我不違計焉孟英見之拜讀千遍且曰勦漢學以欺世由來久矣徐靈胎之論無此透徹可與退之原道文並峙當考其姓字於仲景先師廟內建護聖祠以祝之予謂孟英如此稱許則其可傳也奚疑故附刊此案之後以證王氏婦溫補藥服及三月即所謂陰柔束縛剛猛之故致人受其愚而不覺者後之人可以鑑矣莊半霞芝階中翰之三郎也闈後患感日作寒熱七八次神氣昏迷微斑隱隱醫者無策始迎孟英視之曰此平昔飲酒積熱深蘊挾感而發理從清解必誤投溫補以致熱勢披猖若是詢之果三場皆服參且攜棗子浸燒酒入闈初病尚不至此因連服羌防薑桂漸以滋甚孟英曰是矣先以白虎湯三劑斑化而寒熱漸已繼用大苦寒之藥瀉其結熱所下黑矢皆作棗子氣旬日後與甘潤滋濡之法兩月始得全愈

噤口痢虛熱在胃也補虛則礙熱清熱則妨虛茲又加以食積尤

金應谷舍人次郎魁官九月間患五色痢日下數十行七八日來口噤不納腹痛呻吟危在旦夕矣有主人參以補之者有主生軍以蕩之者舉家皇皇不知所措孟英視之曰暑挾食耳誤服熱藥矣攻補皆不可施也輕清取之可即愈焉以北沙參黃連鮮蓮子梔子黃芩枇杷葉石斛扁豆銀花桔

為棘手須看
其用藥圖到
處

梗山查神麴滑石為方其家以為病深藥淡恐不濟事西席莊曉村云縱使藥不勝病而議論極是
定不致加病也竭力贊其居停投之覆杯即安旬日而起予聞孟英嘗曰蓮子最補胃氣而鎮虛逆
若反胃由於胃虛而氣衝不納者但日以乾蓮子細嚼而嚥之勝於他藥多矣凡胃氣薄弱者常服
玉芝丸能令人肥健至痢證噤口皆是熱邪傷其胃中清和之氣故以黃連苦泄其邪即仗蓮子甘
鎮其胃今肆中石蓮皆偽味苦反能傷胃切不可用惟鮮蓮子煎之清香不渾鎮胃之功獨勝如無
鮮蓮則乾蓮亦可用或產蓮之地湖池中淘得入水不腐之老蓮即古所謂真石蓮也昔人治噤口
痢多用此然可不必拘泥庶免作偽之人以膺亂真反致用而無效徒使病不即愈也

附玉芝丸

孟英

豬脂一具治淨以蓮子去心入脂內水煎糜爛收乾搗為丸服

陳足甫稟質素弱上年曾經吐血今夏患感之後咳嗽夜熱飲食漸減醫作損治滋陰潛陽久服不
效秋杪孟英診之曰陰分誠虛第感後餘熱逗遛於肺阻氣機之肅降搏津液以為痰此關不清雖
與滋填培補之藥亦焉能飛渡而行其事耶先清肺氣以補胃津俾治節行而灌溉輸然後以甘潤

濃厚之法補實真陰始克有濟乃尊仰山聞之擊節歎服如法施之果漸康復

胡蔚堂舅氏年近古稀患囊腫小溲赤短寒熱如瘧孟英曰非外感也乃久蘊之濕熱下流氣機尚

未宣泄與五苓合滋腎加棟實梔子木通兩劑後囊間出腥粘黃水甚多小溲漸行寒熱亦去繼與

知柏八味去山藥莢肉加梔子棟實芍藥苡仁等久服而愈壬寅夏感受暑濕誤投溫散以致譫語

神昏勢瀕於危而肛前囊後之間潰出腥膿瘡口深大瘍科以為懸癰也敷治罔效時孟英患病未

痊予固邀其扶病一診孟英曰懸癰乃損怯證成之以漸今病來迅速腥穢異常是身中久蘊厚味

補熱夜熱原
有肺熱血瘀
二候斷非滋
陰所能愈况
溫病之後咳
嗽夜熱顯為
遺邪在肺滋
陰藥愈液干
涉矣

濕熱之毒挾外受之暑邪無所宣泄下注而為此證切勿敷藥以遏其外走之熱但舌強而紫赤脈細而滑數客邪熾盛伏熱蘊隆陰分甚虧深虞津涸先與清營之劑三投而神氣漸清次以涼潤陽明便暢而熱蠲膿淨改用甘柔滋養月餘潰處肌平善後參入參耆竟得康強如昔

汪吉哉久患不愈醫謂元氣已虛雜投溫補漸至肌瘦內燔口乾咳嗽寢汗溺赤飲食不甘孟英視

之曰餘邪逗溜血分也與秦艽鼈甲散而瘳真堂兄養餘亦患瘧數月多醫療之罔效肌瘦自汗腰

膝痠軟不能稍坐極其畏冷孟英曰此大虛證胡反不補猶以消導是何居心與參耆木草熟地白

芍五味杜仲山藥龍骨牡蠣桂枝大棗小瓜服數十帖而起

孟英治其令叔高年痰嗽喘逆礙卧肢冷顫紅飲食不進與真武湯而安

湖墅張春橋素稟不堅頭眩腦鳴頻服溫補藥甚覺畏冷人皆謂其體偏於寒也辛丑春始請孟英

診之脈甚數曰陰虧也溫補非宜改服滋水培元之劑頗為有效夏間或勸以灸火云可以除百病

蓋未知灼艾之可以除百病者謂可除寒濕凝滯陽氣不能宣通之證非謂內傷外感一切之病皆

可灸以除之也故仲景有微數之脈慎不可灸之訓正以艾火大能傷陰也灸後數日即寒少熱多

宛如瘧疾醫者以為脾寒病投以溫散日以滋甚春橋知藥治未符堅不肯服乃父與之詢其故漫

曰要兒服藥須延王先生診視與之遂邀孟英治之切其脈滑數倍加曰陰虛之體內熱自生灸之

以艾火氣內攻時當溽暑天熱外燥三者相交陰何以堪再投溫散如火益熱當從瘧瘧治專以甘

寒自熱則陰津不致枯涸而寒熱不攻自去所謂治病必求其本也竟不用一分表散藥而治愈

樓流所司藥陳芝田於仲夏患感諸醫投以溫散延至旬日神昏譫妄肢搐耳聾舌黑唇焦囊縮溺

眼前道理而人多不悟一經拈出便成名論此與以針治虛損者同一悖謬

一派甘寒之藥既可滌熱又以生津真治溫良法也惟濕溫證宜稍加斟酌耳

從陰引陽從陽引陰絕妙機軸

滴胸口隱隱微斑一望而知其危矣轉邀孟英診之脈細數而促曰陰虧熱熾液將涸矣遂用西洋參元參生地二冬知柏棟實石斛白芍甘草梢銀花木通犀角石菖蒲大劑投之次日復診其家人云七八日來小溲不過涓滴昨藥服六七個時辰後解得小溲半杯孟英曰此即轉機也然陰氣枯竭甘涼濡潤不厭其多於前方再加龜甲百合花粉大鍋煎之頻灌勿歇如是者八日神氣始清諸恙悉退純用滋陰之藥調治匝月而瘳予謂孟英學識過人熱腸獨具凡遇危險之候從不輕棄最肯出心任怨以圖之如此案八日後神氣始清若經別手縱使治法不錯而一二帖後不甚起色必規避堅辭致病家惑亂謀及道旁雖不死於病亦必死於藥矣此在醫者之識老心堅又須病家之善於擇而任之專也談何易耶且聞孟英嘗云溫熱液涸神昏有投犀角地黃等藥至十餘劑始得神清液復者因溫熱案最夥不暇詳錄姑識此以告司人之命者

江小香病熱色篤浼人迎孟英診之脈虛絀而小數頭痛偏於左後子夜熱躁肢冷欲嘔口乾不欲飲不飢不欲食舌蹇言謇溺黃而頻曰體屬素虛此由患感時過投溫散陰津陽氣皆傷後來進補而勢反日劇者滋膩妨其中運剛烈動其內風以致醫者僉云表之不應補亦無功竟成無藥可治之證雖然不過難治耳未可遽棄也與秋石水拌製高麗參從蓉首烏生白芍牡蠣棟實鹽水炒橘紅桑葚石斛蒺藜茯苓煎吞飯丸肉桂心五分一劑躁平嘔止各恙皆減連投數服粥食漸安乃去首烏桂棟加砂仁末拌炒熟地菊花枸杞半月而瘳

溽暑之令瘡疹盛行幼科僅知套藥升藥防葛亂施殆亦疫癘之病造化默行其殺運歟陳仰山家患此者十餘人其長郎書芾孝廉之女勢最劇以瘡甫出而汛至也醫者却走始延孟英視之脈滑

而數舌絳大渴面赤音失不食便瀉曰此由發散太過火盛風熾氣血兩燔氣分之邪由瀉而略泄其燄營分之熱由汎而稍解其焚豈可畏其脫陷妄投止澀耶與西洋參石膏知母麥冬犀角生地連翹甘草石斛丹皮桑葉竹葉大劑投之三日而愈養陰善後遂以漸安其餘或輕或重孟英一以清解而痊

石誦義夏杪患感多醫廣藥病勢日增延踰一月始請孟英診焉脈至右寸關滑數上溢左手絃數耳聾口苦熱甚於夜胸次迷悶嘔吐粘沫啜飲咽喉阻塞便溏溺赤間有譫語曰此暑熱始終在肺並不傳經一劑白虎湯可愈者何以久延至此也乃尊北涯出前所服方見示孟英一一閱之惟初診顧聽泉用清解肺衛法為不謬耳其餘溫散升提滋陰涼血各有來歷皆費心思原是好方惜未中病而北涯因其溏泄見孟英君石膏以為治不敢與服次日復診自陳昨藥未投惟求另施妥法孟英曰我法最妥而君以為未妥者為石膏之性寒耳第藥以對病為妥此病舍此法別無再妥之方若必以模稜迎合為妥恐賢郎之病不妥矣北涯聞而感悟頗有姑且服之之意而病者偶索方一看見首列石膏即曰我胸中但覺一團冷氣湯水皆須熱呷此藥安可投乎堅不肯服然素仰孟英手眼越日仍延過診且告之故孟英曰吾於是證正欲發明夫邪在肺經清肅之令不行津液凝滯結成涎沫盤踞胸中升降之機亦窒大氣僅能旁趨而轉旋是一團涎沫之中為氣機所不能流行之地其覺冷也不亦宜乎且予初診時即斷為不傳經之候所以尚有今日而能自覺胸中之冷若傳入心包則舌黑神昏纔合吳古年之犀角地黄矣然雖不傳經延之踰月熱愈久而液愈涸藥愈亂而病愈深切勿以白虎為不妥急急投之為妙於是有敢服之心矣而又有云曾目擊所親

某石膏甫下嚙而命亦隨之。況月餘之病耳聾泄瀉正氣已虧。究宜慎用北涯聞之惶惑。仍不敢投。乃約翼日廣徵名士會商可否。比孟英往診。而羣賢畢至。且見北涯求神拜佛。意亂心慌。殊可憐憫。欲與衆商權。恐轉生掣肘。以誤其病。遂不遑謙讓。援筆立案云。病既久延。藥無小效。主人之方寸亂矣。予三疏白虎而不用。今仍赴招診視者。欲求其病之愈也。夫有是病則有是藥。諸君不必各抒高見。希原自用之愚。古云鼻塞治心耳聾治肺。肺移熱於大腸則為腸澼。是皆白虎之專司。何必拘少陽而疑虛寒哉。放膽服之。勿再因循致貽伊戚也。坐中顧聽泉見案。即謂北涯曰。孟英腸熱膽堅。極堪倚賴。如猶不信。我輩別無善法也。顧友梅許芷卿趙笛樓亦皆謂是疏方。以白虎加西洋參貝母花粉黃芩紫苑杏仁冬瓜仁枇杷葉竹葉竹茹竹黃而一劑甫投。咽喉即利。三服後各恙皆去。糜粥漸安。乃改甘潤生津調理而愈。予謂此案不僅治法可傳。其闡發病情處。識見直超古人之上。

劉廉方常州名士也。在西湖受暑。移榻於崔仲遷別駕處。醫治垂危。莊芝階舍人拉孟英往診之。裸卧昏狂。舌黑大渴溺赤。便秘脈數。而托與犀角地黃湯。加減服之。神識已清。略能進粥。次日復診。頗知問答。大有生機。仍處甘涼法以贈之。并囑伊格外謹慎。而越日莊半霞詣孟英偕往診視。見其目張睛瞪。齒露唇焦。氣喘汗出。揚手擲足。而不可救藥矣。衆楚交咻。謂是寒涼藥凝閉而然。孟英曰。病之宜涼宜熱。汝輩不知也。服乃皮裏之事。汝等不見也。吾亦不屑為之爭辨。惟目瞪唇焦。人所共覩。則其死於何藥。自有定論。遂拂衣出。半霞再三請罪。孟英曰。俗人之見。何足介懷。是非日後自明於我心。無慊焉。第斯人斯病。皆可惜也。既而始知有人主熱藥以僨事。豈非命耶。僅二載而仲遷病。孟英聞之曰。殆矣。蓋知其陰虛而受暑濕。恐主藥者未必能悔悟於前車也。後果聞其廣服溫補之劑。

以致真陰竭絕而死。覆轍相尋，迷而不醒，可哀也已。

甌鎮孫總戎令郎楚樓，自鎮江來浙，住於石北涯家。途次即患寒熱如瘧，脇痛痰嗽。北涯見其面鰲形瘦，頗以為憂。即延醫與診，醫謂秋瘧與疏散方。北涯猶疑其藥不勝病，復邀孟英視之，曰：陰虧也。勿從瘧治，以葦莖湯加北沙參、熟地、桑葉、丹皮、海石、旋覆、貝母、枇杷葉為劑。北涯見用熟地，大為駭然。孟英曰：君慮彼藥之不勝病，吾恐此病之不勝藥。贈此肅肺潤燥滋腎清肝之法，病必自安。楚樓聞之，歎曰：妙手也。所論深合病情。前在姑蘇服疏散藥，甚不相安。居停毋疑我服王公之藥矣。果數日而痊。踰旬，即東渡赴甌去。

姚雪樵孝廉之太夫人，年踰花甲，患感兩月，醫皆束手。始延孟英診之，身已不能轉側，水飲難於下。嚔聲音不出，便溺不通。曰：此熱邪逗留不去，津液剝削殆盡。計其受病之時，正當酷暑，豈即溫補是投，但知其虛而不知其病耶？閱前服諸方，惟初手顧聽泉從，吸受暑邪，輕清開上立治，為合法耳。餘方非不是，起死回生之藥，其如與病無涉何？而阮某小柴胡方服之最多。蓋醫者執此和解之法，謂不犯汗吐下三者之險，豈不穩當？病家見其參胡並用，謂補正祛邪，具一舉兩全之美。最為上策。孰知和解足少陽傳經傷寒之劑，不可以概和各經各氣之各病。徒使參胡提升熱邪，以上逆致一身之治節，無以清肅下行，而薑棗溫膩濕濁於中焦，致運化之樞機失其灌溉之布，氣機愈窒，津液愈乾。和解之湯愈進，而氣愈不和，病愈不解。今則雖有良治，而咽喉僅容點滴，氣結津枯。至於此極，英雄無用武之地矣。雪樵昆季力懇援救，乃疏甘涼濡潤之方，囑其不限時刻，不計多寡，頻以水匙挑入，使其漸滲下喉。而一日之間，僅灌一小杯許。其病勢之危於此，可想直灌至旬餘，氣機始漸流行。

藥可服小半劑矣。人見轉機之難，不無議論旁生。賴孟英靜鎮不搖，乃得日以向愈。粥食遞加，惟大解久不行，或以為憂。孟英曰：無恐也。水到渠成，穀食安而津液充，則自解矣。若欲速妄攻，則久不納穀之胃，尚有何物以供其蕩滌哉？至九月下旬，始有欲解之勢。孟英連與補氣益血之藥，尚不能下於前方，加蜣螂一對，熱服即解。凡不更衣者，計及五十日矣。聞者莫不驚異，繼以平補善後而痊。仲冬大雪連朝，積厚丈許，嚴寒久凍，西湖可行車馬斯時也。盛少雲患痰嗽，夜熱自汗，不寐，左脇痛如鐵刺，肌削不飢，自問不起矣。請孟英託以後事及診其脈，許以可生。蓋病來雖惡，未經誤藥也。與固本加龜板、鼈甲、從蓉、知柏、青黛、石斛、花粉、白芍、棟實、海石、旋覆、貝母、蛤殼、牛膝，出入為大劑，投之即效。連服四五十帖而痊。予謂斯證患於斯時，若經別手，未有不投溫補者，而少雲能與孟英遊，其亦具眼之人乎？此真所謂患難交，不可不留心於平日也。然亦不能人人而遇之。殆佛氏所謂有緣存乎其間歟。

壬寅春邵小墀室患，汎愆釋醫診以為妊，廣服保胎藥，漸至腹脹跗腫，氣逆礙臥，飲食不進。入夏延

孟英視之，曰：血虛氣滯，誤補成脹也。先以黃連、厚朴、先疏其滯山查、雞內金、橘皮、大腹皮、枳實、茯苓、梔子、棟實、

杏仁、紫苑、旋覆等藥，少佐參朮服之。氣機漸運，脹去食安，漸入滋陰養血之治。數月經行而愈。

一人患晨泄有年，累治不效。而春間尤甚。孟英按其脈曰：汝雖苦瀉而瀉後腹中反覺舒暢乎？曰：誠

然。苟不泄瀉，又脹悶減食矣。而服四神附桂之藥，其瀉必加。此曷故也？曰：此非溫升補澀之證，乃肝

強脾弱，木土相凌處。一方令其常服數帖即安。後竟無此恙矣。方用白朮、苡仁、黃連、棟實、桂枝、茯苓、

木瓜、芍藥、蒺藜、橘皮而已。

凡心腎不交
之人多不能
仰臥以仰則
腎氣不能上
承而心氣愈
浮也

不寒不燥真
陰虛血滯者
之良劑

通人之論無
論熱藥寒藥
用不得當皆
足誤人不可
不知

邵魚竹給諫起居食飲如常。惟僅能側臥略難仰睡。仰而寤無恙也。稍一合眼則驚竄而醒。雖再側眠亦徹夜不得寐矣。多年莫能治。孟英以三才合枕中丹加黃連肉桂服之。良效。其長郎子旒久患痰多胸膈滿悶。連年發癩。藥之罔效。孟英脈之曰：氣分偏虛。痰飲阻其清陽之旋運。宜法天之健以為方。則大氣自彊而流行不息。胸次乃廓然如太空矣。與六君去甘草加黃耆桂枝薤白萸仁石菖蒲蒺藜旋覆服之。滿悶漸舒。癩亦不發矣。

予荆人。媿後惡露不行。或勸服生化湯。適孟英枉顧診曰：陰虛內熱。天令炎蒸。雖赤沙糖不可服也。以生地丹參丹皮豆卷羌蔚子茯苓桃仁山查梔子澤蘭琥珀投之。即效。且無別恙而易健。可見體質不齊。藥難概用。況其致病之因不一。病機傳變無窮。語云：量體裁衣。而治病者可不辨證而施治耶？孟英常曰：凡產後世俗多尚生化湯。是以一定之死方。療萬人之活病。體寒者固為妙法。若血熱之人。或兼感溫熱之氣者。而一概投之。驟則變證蜂起。緩則羣損漸成。人但知產後之常有。而不知半由生化湯之厲階。此風最盛於越。方本傳於越之錢氏。自景岳采入八陣。遂致流播四海。人之陰受其害者數百年矣。從無一人能議其非。今特為此長夜之燈。冀後人不致永遠冥行。或可稍補於世。但景岳最偏於溫補。而獨於產後一門力辨丹溪大補氣血為主之非。可謂此老之一隙微明。惜猶疑於產後宜溫之謬說。蓋由未入仲聖之宮牆也。

戚媪者。年六十餘矣。自幼傭食於黃連泉家。忠勤敏幹。老而彌甚。主僕之誼。勝於親戚也。秋間患霍亂轉筋。孟英視之。暑也。投自製蠶矢湯兩服而安。三日後忽然倦臥。不能反側。氣少不能語言。不飲不食。連泉惶懼。不暇遠致。孟英即邀濟仁堂朱某診之。以為霍亂皆屬於寒。且昏沈欲脫。疏附子理

可見浙人稟賦之薄若幽冀之人即誤服青麟丸數錢亦不至如斯之甚也

中湯與焉。蓮泉知藥猛烈不敢遽投。商之王安伯。安伯云：以予度之，且勿服也。若謂寒證，則前日之藥下嚥即斃，吐瀉安能漸止乎？蓮泉聞之大悟。若人飛趕孟英至而切其脈，曰：此高年之體，元氣隨瀉而泄，固當補者。第餘暑未清，熱藥在所禁耳。若在孟浪之家，必以前之涼藥為未當。今日溫補為極，是縱下咽不及救，亦惟歸罪於前手寒涼之誤也。設初起即誤死於溫補，而世人亦但知霍亂轉筋是危險之證，從無一人能知此證有陰陽之異。治法有寒熱之殊，而一正其得失者，此病之所以不易治，而醫之所以不可為也。今君見薑附而生疑，安伯察病機之已轉，好問者心虛識機者智贖。二美相濟，遂使病者跳出鬼門。關醫者却脫無妄罪，幸矣幸矣。乃以高麗參、麥冬、知母、姜、蕤木、瓜、扁豆、石斛、白芍、苡仁、茯苓、藜藜為方，服六劑，始能言動，漸進飲食，調理月餘而健。

七月十八日夜，予患霍亂，轉筋甚劇，倉卒間誤服青麟丸錢許，比曉急遶孟英診之，脈微弱如無耳。瞽目陷，汗出肢冷，音啞肌削，危象畢呈。藥恐遲滯，因囑家慈先濃煎高麗參湯，亟為接續，隨以參朮白芍、茯苓、附桂、乾薑、木瓜、苡仁、扁豆、蓮實為方，一劑而各證皆減，次日復診。孟英曰：氣分偏虛，那堪吐瀉之泄，奪誤餌苦寒，微陽欲絕。昨與真武理中合法，脾腎之陽復辟矣。剛猛之品可以撤去，蓋吐瀉甚而津液傷，筋失其養，則為之轉筋。生白比之瘞病，例可推也。凡治轉筋，最要顧其津液。若陽既回而再投剛烈，則津液不能復而內風動矣。此治寒霍亂之用附桂亦貴有權衡，而不可漫無節制。致墮前功也。即於前方裁去薑附、肉桂，加黃耆、石斛，服至旬日而愈。予謂此番之病，危同朝露，若非孟英，恐不能救。常聞張柳吟云：但使病者聽孟英論病之無微不至，用藥之無處不到，源源本本，信筆成章，已覺疾瘳過半。古云：檄愈頭風，良有以也。

此必別有外證可憑故直斷為暑與痰濕未有專視脈之托與歇至而如是定斷者讀者勿被瞞過此方可謂峻極良由識高非徒膽大

用補亦要用得其宜方能奏效非一味蠻補即能愈病也案中諸治可以為法

陳藝圃亦知醫其室人於仲秋患霍亂轉筋自診以為寒也投熱劑勢益甚延朱茂才視之亦同乎主人之見也病尤劇始請孟英決之曰寒為外束之新邪熱是內伏之真病口苦而渴薑附不可投矣與河間法人皆不之信也再與他醫商之仍投熱藥乃至口鼻出血而死極其悔歎始服孟英之卓見也謂霍亂一證近來時有而醫皆不甚識清楚死於誤治者極多孟英特著專論雖急就成章而辨晰簡當略無支漏實今日醫家首要之書以其切於時用不可不亟為熟讀而研究也

顧雲垞體豐年邁患疾於秋脈托而稍有歇止孟英曰托者暑也歇止者痰濕阻氣機之流行也大忌溫補以助邪氣及與清解蠲痰之法病不少減而大便帶血孟英曰暑濕無形之氣而平素多痰邪反得以盤踞頗似有形之病清解不克勝其任氣血皆受其滋擾必攻去其痰使邪無依附而病自去切勿以高年而畏峻藥伊姪桂生少府亦精於醫者也聞之極口稱是遂以桃仁承氣湯加西洋參滑石苓連橘紅貝母石斛為方送礞石滾痰丸乃郎石甫孝廉云此藥在他人必畏而不敢服我昔年曾患暑濕證深悉溫補之不可輕試况高明所見相同更何疑乎徑服二劑下粘痰汚血甚多瘧即不作仍以清潤法善後而康

邵子受令壺患吐血肌膚枯澀口渴脈虛大孟英曰氣分之陰虧也溫補既非滋填亦謬以參耆二冬知母百合萎蕤石斛桑葉枇杷葉投之而愈

九月間張春橋患瘧寒少熱多間二日而作甫兩發形即消瘦孟英診曰脈絃而細尺中甚數疾作於子夜口乾嗜飲乃足少陰熱瘧也兩發遽爾形消胡可玩視吾以妙藥奉贈可期即已但請即服不可商於人而致生疑議也方用元參生地知母丹皮地骨皮天冬龜板茯苓石斛桑葉春橋以向

所心折遂服之一劑瘧即止再以滋陰善後而愈予謂此證一帖而瘳似乎輕易但非真才實學焉
有此種妙治設遇別手非溫補即提表其禍可勝道哉然天下之病無論輕重總貴初治得法何致
輕者重而重者危耶奈世俗之情必使輕者重而後轉安始知醫藥之功殊可歎也按此證世人但
知其為三陰瘧籠統治以溫補之法從未聞有分經用藥者今提出少陰二字創立清涼之劑用藥
精當取效敏捷法似新奇理自完足所謂活人治活病全以活潑運之也可以啟人慧悟垂作典型
金寬甫初冬患感局醫黃某聞其向來不拘何病總須溫藥而痊胸懷成見進以薑桂之方漸至足
冷面赤譫語煩躁疑為戴陽而束手矣舉家徬徨延孟英診焉曰此伏邪晚發誤與升提熱浮於上
清解可安寬甫猶以向不服涼藥為疑方中苓連之類堅不肯用乃兄愿谷中翰極力開導督人煎
而飲之果得霍然

周曉滄乃郎品方患冬溫所親顧聽泉知其體屬陰虧病非風寒也不犯一分溫升之品而證不能
減勢頗可危乃虛懷轉邀孟英診之曰所治良是也但於方中加貝母杏仁紫苑冬瓜子等味與之
遂效可見藥貴對病雖平淡之品亦有奇功孟英嘗云重病有輕取之法於此可見

癸卯春邵秋子令堂年近六旬患寒熱如瘧者久矣諸醫雜治罔效孟英視之曰此濕邪久蘊已從
熱化誤投提補動其肝陽痰飲因而上逆與通降之法寒熱即減而包某謂瘧久陰虛理宜滋養病
家聞之近是遂進首烏鼈甲等藥漸至脈伏胸痞呃忒自汗渴飲不食顴赤便泄包某束手疏生脈
散以塞責舉家徬徨再求孟英診之曰此滋_{音用}膩_地阻_者塞_機氣_機清陽不司旋運痰飲閉滯隧終非脫象也
補藥不可進以_{清熱}芩_散薏_散蘆_散白_散合_散小_散陷_散胸_散加_散菖_散蒲_散竹_散茹_散旋_散覆_散貝_散母_散杏_散仁_散紫_散苑_散枇_散杷_散葉_散投_散之_散呃_散止_散脈_散出_散大有

痘原感疫而
發醫林改錯
中言之甚詳

轉機而鄭某謂病固屬痰須溫熱以宣通勿寒涼而凝遏病家又惑焉薑桂頻投既而唇腫咽疼不能進飲舌乾短硬難出語言復詣孟英救療與犀角地黃湯甘寒生事以救燥加元參別之失知母銀花竹黃花粉膽星石菖蒲竹瀝之類六七劑吐出極臭膠痰甚多粥飲漸進此第三次生機也奈狂瀾莫障邪說橫行輒以涼藥不宜擅服久病必定元虛甘言悅耳遂至升散溫補各逞所能符咒乩方罔不徧試延至仲夏腭腐齟糜唇高數寸竟成燎原莫救仍懇孟英設法乃堅辭不能措手付局醫黃某敷治腫爛日甚而終

上年秋燥冬暖略無霜雪河井並涸吾杭自九月間起天花流行十不救五小兒之殤於是者日以百計孟英曰此痘疫也治法當與常痘有異惜幼科未之察耳且天令發泄不主閉藏入春恐多喉患特刊加味三豆飲方俾未曾佈痘者預服免患將出者恣飲莫輕又勸人頓服青龍白虎湯以杜春來喉恙不料其言果應三春不雨喉疹甚多醫者猶不悟其致病之因僅知發散正如火上添油孟英胸有成竹一以仲聖白虎湯為救焚主劑若已及於營分者用晉三犀角地黃湯相機加減又刊青龍白虎湯暨錫類散方廣為印送賴此以活者不可勝數

附加味三豆飲 生綠豆 生黃豆 生黑豆或用生扁豆亦可 生甘草 金銀花 水煎服 孟英原

刻自注云古方三豆飲為痘證始終可服之妙藥未出時常服痘可使稀將出時急服重可冀輕

已出時恣服逆可轉順盡出時頓服毒可易清俗傳種痘是密室烘花更有初生小兒於十八日

內服藥令其出痘之法是握苗助長此等矯揉造作陰受其害者古今來不知幾恒河沙數矣至

於種種稀痘之方皆無義意或以毒藥損人元氣或以穢物致生別恙慎勿為其所惑惟此方藥

極簡易性最平和味不惡劣易辨易服不必論其體質久服無弊誠盡善盡美之王道藥也杭人感於患痘不食豆之說甚屬可鄙今特辨明冀人醒悟凡小兒能啜飲後即以此藥日日代茶誠保赤之首章焉原方用赤豆性燥傷陰予以黑大豆易之更有補陰之績雖燥令燥體皆無礙矣再益銀花甘草而化毒之功最勝或疑銀花性涼似難久用不知三豆皆穀也性能實脾得銀花以濟之更覺沖和況小兒體稟純陽極宜此甘涼補陰之味豈特稀痘尤能明目消疳不生瘡癩泄瀉等病其功未能殫述也

附青龍白湯

橄欖

生蘆服

水煎服

孟英自注云此予自制方也橄欖色青清足厥陰內寄

之火風而靖其上騰之欲蘆服色白化手太陰外來之燥熱而肅其下行之氣合而為劑消經絡留滯之痰解膏梁魚麵之毒用以代茶則龍馴虎伏藏府清和豈但喉病之可免耶且二味處處皆有人人可服物異功優久任無弊實能弭未形之患勿以平淡而忽諸

附錫類散

象牙屑

焙

真珠

各二

飛淨青黛

梅花冰片

三釐

壁錢

二十個

西牛黃

甲各五釐男病用女病用男合送濟人須分別配之

共研極細粉吹患處流出惡涎即愈

孟英自注云此專治爛喉

痧疹之神方也尤鶴年附載於金匱翼云張瑞符傳此方以救人而得子故予名之曰錫類散

段春木之室爛喉內外科治之束手姚雪蕉孝廉薦孟英視之骨瘦如柴肌熱如烙勅痰阻於咽喉不能咯吐須以紙帛攪而曳之患處紅腫白腐齧舌皆糜米飲不沾凡事非期而至按其脈左細數右絃滑曰此陰虧之體伏火之病失於清降擾及於營先以犀角地黃湯清營分而調妄行之血續與白虎湯加西洋參等肅氣道而瀉燎原之火外用錫類散掃痰腐而消惡毒繼投甘潤藥蠲餘熱

種痘之法以人巧而奪天工原屬妙法但須慎於擇時若疫氣流行之時感其氣者尚有腫頤爛喉之酷况又加以痘毒耶此乃醫之不明未可盡歸咎於種痘也

而充津液日以向安月餘而起

吳雨峯明府家囑兒科為其仲郎所出之兩孫種痘下苗二三日發熱咽疼醫以為痘之將形也投

以升透之藥赤斑似錦喉爛如焚半月之間闔家傳染諸醫莫敢入其室孟英往診時見其三郎耕

有四郎小峯尚未病亟曰已病者固當圖治未病者尤宜防患傳以青龍白虎湯代茶恣飲竟得無

恙其令閩洪宜人及仲媳皆為之治愈此外如其長媳其三孫其僕其探病之女戚殞於是

病者七人焉時雨峯築巖兩喬梓咸宦於外仲郎亦幕遊江右不料因種痘而釀此家禍益信孟英

勸人勿種痘之說為可訓矣

潘洪疇託兒醫為其仲郎春波所出之孫種痘下苗三日即咽痛醫與升散藥發熱斑爛七朝而天

春波及其弟祥行皆染其病春波之證顧聽泉治而愈矣祥行之恙咽喉爛至於舌胸膈痞塞不通

牙關緊澹小溲淋痛口流紫黑血塊人皆謂其臟腑爛焉孟英視之曰惡血毒涎正欲其出吹以錫

類散用椀承其口流出涎血甚多咽喉牙環胸膈皆得漸舒投以犀角地黃湯加元參銀花童溺藕

汁竹黃花粉貝母石菖蒲之類漸以向安繼與生津填補而痊

夏間顧聽泉邀孟英視其所親屠綠堂之恙孟英曰陰生可慮果於夏至前五日而卒屠之五令郎

患痰嗽者數年近因悲哀病作徐某見其嗽甚則吐也投以參朮之劑病益甚閏七月十七夜綠堂

忽示夢云汝病須延孟英診視服溫養藥可愈覺而異之即迂過診孟英曰此陰虛勞嗽嗽久而衝

氣不納則嘔吐非胃寒也經言勞者溫之亦溫養之謂非可以溫補施之者病者見案更為驚歎始

以父夢告焉孟英亦為之肅然方用西洋參熟地從蓉二冬茯苓坎版牡蠣紫石英萎蕤枇杷葉橘

皮服之果安予謂凡事皆可以感天地格鬼神況醫為性命之學耶即此一案可以知孟英之手眼通天非幸獲虛名者所能仰望也

胡秋紉於酷熱時偶有不適醫以柴葛香薷散之反惡寒胸痞更醫用枳朴檳榔以瀉之勢日劇延孟英視之自汗不收肢背極冷奄奄一息脈微無神曰稟賦素虧陽氣欲脫此必誤認表證使然與救逆湯加參耆服之漸安繼以補氣生津調理匝月而痊

陳芟裳患淋久不愈延至溽暑邀孟英診之曰易事耳與補中益氣湯而愈其子荷官病痞積腹脹發熱乾嗜善食黃瘦便溏溺赤兒科藥廣服無功已將絕望矣孟英聞而憐之曰吾於幼科雖未討論姑贈一方或有生機也以黃連白芍牡蠣鼈甲雞肫皮五穀蟲霞天麴木瓜山查棟實橘皮桔梗旋覆梔子丹皮等藥投之一劑知旬餘愈

段堯卿之太夫人患霍亂轉筋年踰七十矣孟英投自制連朴飲三啜而瘳霍亂案甚夥不遑廣采姑錄數則以示一斑

石誦義室久患痰嗽諸醫藥之勿瘳孟英切其脈曰非傷風也與北沙參熟地百合麥冬貝母紫苑姜蕤枇杷葉鹽水炒橘皮燕窩一劑知數劑已初秋又患腕痛上及肩尖向以為肝氣轉服破削之品孟英曰亦非也以砂仁炒熟地炙橘紅棟實延胡枸杞當歸茯苓桑葉蒺藜為方服之良效繼即受孕矣

石芷卿患感張某連投柴葛藥熱果漸退而復熱之後熱更孔甚乃延孟英診焉先以梔豉苓連等藥清解其升浮之熱俟邪歸於府脈來絃滑而實徑用承氣湯下之時其尊人北涯赴甌無人敢主

合觀二案其人必陰虛肺燥之質故用藥如此

其可服否也另招他醫決之以為太峻且腹不堅滿妄攻慮變舉家聞之搖惑暮夜復懇再診孟英辨論洋洋堅主前議服後果下黑矢次日大熱大汗大渴引飲孟英曰此府垢行而經熱始顯與竹葉石膏湯二劑而安繼以育陰充液調理而康

朱某患痢於越表散蕩滌滋膩等藥備嘗之矣勢瀕於危始返杭乞孟英診之神氣昏沈耳聾腕悶口乾身熱環臍硬痛異常晝夜下五色者數十行小溲澀痛四肢抽搐時時暈厥曰此暑濕之邪失於清解表散蕩滌正氣傷殘而邪乃傳入厥陰再以滋膩之品補而潤之遂成牢不可拔之勢正虛邪實危險極矣與白頭翁湯加棟實從蓉芩連梔芍銀花石斛桑葉橘葉羚羊角牡蠣海蛇鼈甲雞內金等藥大劑頓灌一帖而抽厥減半四帖而抽厥始息旬日後便色始正溲漸清長粥食漸進半月後臍間之硬始得盡消改用養陰調理踰月而康

鄰人汪氏婦之父王叟仲秋患痰嗽不食氣喘不卧囊縮便秘心搖搖不能把握勢極可危伊女浼家慈招孟英救之曰根蒂欲脫耳非病也以八味地黃湯去丹澤合生脈加紫石英鉛龍牡胡桃肉棟實從蓉投之大解行而諸恙減乃去從蓉麥冬服旬日以瘳初冬邵可亭患痰嗽面浮微喘醫謂年踰花甲總屬下部虛寒進以溫補納氣之藥喘嗽日甚口涎自流莖囊漸腫兩腿腫硬至踵不能稍立開口則喘逆欲死不敢發言頭仰則咳嗆咽疼不容略卧痰色黃濃帶血小溲微黃而長許芷卿薦孟英視之脈形絃滑有力曰此高年孤陽熾於內時令燥火薄其外外病或可圖治真陰未必能復且平昔便如羊矢津液素乾再投溫補如火益熱矣乃以白虎湯合瀉白散加西洋參貝母花粉黃芩大劑投之并用北梨搗汁頻飲潤喉以緩其上潛之火數帖後勢漸減改投葦莖湯合青

燥救肺湯加海蛇蛤殼青黛等藥竹瀝為方旬日外梨已用及百斤而喘始息繼加坎版鼈甲犀角
此却不必以病者難服也何不另用之
 而以豬肉湯代水煎藥大滋其陰而潛其陽火始下行小溲赤如蘇木汁而諸證悉平下部之腫隨
 病遞消一月已來共用梨二百餘斤矣適大雪祁寒更衣時略感冷風腹中微痛自啜薑糖湯兩椀
 而喘嗽復作口乾咽痛大渴舌破仍不能眠復用前方以綠豆煎清湯代水煮藥始漸向安孟英謂
 其乃郎步梅曰內經云陰精所奉其人壽今尊翁陰液久虧陽氣獨治病雖去矣陰精非藥石所能
 繼續况年踰六秩長不勝消治病已竭人謀引年且希天眷予以脈察之終屬可虞毋謂治法不周
 贈言不早致有他日之疑成敗之論也

一賣酒人姓陸極窘而又遭顛沛久而患一異疾形消善癢蟲從皮膚而出搔之蠕蠕醫治莫效孟
 英診曰悲哀勞苦陽氣受傷麴蘖浸淫乃從蟲化與亦在熱生虫之治法補氣藥加杉木桑枝而愈

陳芟裳之太夫人陡患嘔吐徹夜不止次早延孟英診之自述因寒而致孟英知芟裳進場家無主
 藥之人若明言屬熱必致畏藥不服矣漫應曰固寒也而疏方則苓連梔棟以大苦寒為劑投之良
 愈

張鄭封室媿後即發熱服生化湯二帖熱益熾而發赤疹顧聽泉診之即與清解三劑不應欲進犀
 角地黃湯而恐病家之狃於產後以生疑也乃拉孟英質之診其脈絃滑而數面赤熱躁胸悶善悲
 肢腫而疼兩肘白疱如扁豆大者數十顆舌上亦有一顆痛礙水飲大便不解已旬日矣曰此不但
 胎前伏暑且有蘊毒而誤服生化湯以助其虐幸初手即用清解尚不致於昏陷犀角地黃極是治
 法猶恐不能勝任乃與聽泉商加西洋參滑石知母銀花花粉人中白蔓仁竹黃貝母桑葉梔子為

劑其所親曰高明斷為熱證何以病者雖渴而喜熱飲耶孟英曰此方中所以多用痰藥也凡胸中有熱痰阻礙氣機者每如是不可以其向不吐痰而疑吾言之妄也若因此而指為寒證則禍不旋踵矣進四帖始得大解頻吐稠痰而各恙皆減飲食漸加孟英曰病勢雖穩餘熱尚熾苟不亟為清滌而遽投補益獨有奪損之虞其母家果疑藥過寒涼必欲招專科調治幸將前方示彼尚不妄施溫補然隔鞞搔癢紀律全無旬日後餘火復然鄭封堅壘孟英設法仍用甘寒療之周身膚蛻如蛇皮爪甲更新其病之再生也可知繼與滋補真陰而起

葉書三患效逆上氣頭偏左痛口渴不饑便瀉如水王瘦石薦孟英視之曰此肝陰胃汁交虛時令燥邪外薄與育陰息風清燥滋液之法日以漸安服及兩月大解反形乾結而痊

鄭某吐血盈碗孟英服之右關洪滑自汗口渴稍一動搖血即上溢人皆慮其脫意欲補之孟英曰如脫惟我是問與白虎湯加西洋參大黃炭一劑霍然

李秋顧聽泉邊孟英視康康侯副轉之恙切其脈滑數而左歇右促且肝部間有雀啄氣口又兼解索望其面宛如薰黃頭汗自出呼吸粗足似不接續坐卧無須臾之甯便溺澀滯渾赤極臭心下堅硬拒按形若覆碗觀其舌色邊紫苔黃殊不甚乾燥問其所苦曰口渴甜膩不欲飲食苟一合眼即氣升欲喘煩躁不能自持胸中懊懣莫可言狀孟英曰此由濕熱誤補漫無出路充斥三焦氣機為其阻塞而不流行蔓延日久津液為之凝滯而成痰飲不啻人禽雜處苗秀同疇邪正混為一家醫見肢冷自汗不知病由壅閉而然欲以培正而邪氣方張得補反為樹幟豈非資寇兵而贖盜糧哉非其類者鋤而去之乃為喫緊之治聽泉曰良是也夏間起病聞自心悸少寐楊某以為虛而補之

時尚出差辦事暑濕外侵受而不覺迨聞差未竣其病斯發而諸病之藥總不外乎溫補一途以致愈補愈劇今擬溫膽法待君可否孟英曰脈證多怪皆屬於痰今胸痞如斯略無痰吐蓋由痰能阻氣氣不能運痰耳宜於溫膽中加薤白薑仁通其胸中之陽又合小陷胸為治飲痞之聖法參以枳豉泄其久鬱之熱以除懊懣佐以蘭草滌其陳腐之氣而醒脾胃聽泉深然之連投二劑各恙皆減服亦略和而病者以為既係實證何妨一瀉而去之連服大黃丸二次承氣湯半帖孟英急止之曰畏虛進補固非欲速妄攻亦謬蓋濕蒸為熱灼液成痰病非一朝一夕而成治以上下分消為是不比熱邪傳府可一瀉而愈也越日下部果漸腫孟英曰攻痞太速之戒古人不我欺也與聽泉商以前法加黃芩合瀉心意再配雪羹投之痰果漸吐痞亦日消而自腹至足以及莖囊腫勢日加孟英謂勢已如此難以遽消但從三焦設法則自上而下病必無虞與聽泉商用河間桂苓甘露飲意而姚平泉孝廉力主崇土勝濕之法深以寒涼為不可用衆議仍投前日之藥孟英曰前藥原可服也嫌力不足耳次日痰中帶血甚多孟英曰濕熱薰蒸不已自氣及營矣與聽泉暨王子能參軍商以知柏生地犀角鼈甲白芍苡仁貝母石斛茅根麥冬滑石梔子藕汁童溺投之而止踰數日又吐且肢冷自汗心餒畏脫姚平泉謂氣不攝血當主歸脾湯以統之舉家皇皇連請診脈者三次孟英曰脈來屢變陳芝江所以不能指責其病而楊阮諸人皆疑為大虛之候也然望聞問切不可獨憑於指下今漫如赭石湯渾赤有脚其為濕熱之病昭昭若揭初傷於氣分則津液受灼以為痰漸及於營分則陰血不安而妄溢邪氣內盛豈非病實而真實類虛吾不受病之欺也堅守前議靜鎮不搖服二劑果止孟英曰血之復吐也由於氣分之邪以擾及也欲清氣道之邪必先去其邪所依附之痰

前云不可妄
攻此又投峻
下之劑何也
蓋前徒攻其
熱故不中病
而致生他證
此則直攻其
痰始能與病
相當也

蓋津液既為邪熱灼燬以成痰而痰反即為邪熱之山險也不妨峻攻其實而緩行其勢初進滾痰丸三錢得下泄氣一次副轉云四十日來未有之通暢也連投數日始解膠痰黑矢多遍而小溲亦漸清長苔色亦退寢食遂安惟下部之腫猶爾也馬香崖陸虛舟皆主實脾行水之法孟英曰歸參脈證病不在脾況善饑便燥口渴溺多吾方慮轉消證亟投甘潤之不遑惡可參利傷陰補上刮液耶且脾虛下陷之腫與濕盛而腫之腫其膝之上下内外形勢必然相貫今膝之上下内外形勢判毫不毗連蓋由濕熱所釀之痰飲既誤補而痞塞中焦復妄攻以流竄隧絡所謂不能一蕩而蠲勢必旁趨四射吾當以法取之會又咳痰帶血而精神食飲如常孟英曰無恐也此乃前次嚼三七太多兜澀留瘀最不宜用吐而去之極妙但須金水同治冀咳止而血絡不震動為要耳與甘露飲加藕汁童溺服之四劑而止咳嗽亦甯於是專治其下部之腫以固本加知柏貝母花粉旋復橋絡絲瓜絡羚羊角棟實葱鬚豆卷薏苡竹瀝出入為劑二三帖間其高突隆腫之處即覺甚癢搔之水出如汗而作葱氣六七日後兩腿反覺乾瘦燥痛莖囊亦隨之而消矣孟英曰用此潤藥消腫尚且乾痛咽燥設從他議而投燥脾利水之法更當何如哉蓋寒濕則傷陽熱濕則傷陰血液皆陰也善後之法還宜滋養血液稍佐竹瀝以搜絡中未淨之痰使愈後不為他日之患更屬法中之法服之飲食中節便溺有權幸無消渴之虞而竟愈焉

廣孔愚司馬久患溇泄而舌黑氣短自春徂冬治而不效孟英視之曰勞心太過陽燥其陰人見其溇泄輒投溫中不知肺受火形氣失清肅而短促於上則水源不生自然溺少便瀉矣投以肅肺清心涼肝滋腎之法果得漸瘳

周菊生令正患少腹痠墜小溲頻數而疼醫投通利不效繼以升提溫補諸法備試至於不食不寐大解不行口渴不敢飲水聞聲即生驚悸孟英服之曰厥陰為病也不可徒治其太陽先與鹹苦以泄其熱續用甘潤以滋其陰毫不犯通滲之藥而愈

302000

甲.5

中国书店定价	
册数	定价
8	1.60